



10. september 2021

UKA 2021/175

UPA 2022/175

Inatsisartut Suleriaasianni § 36 naapertorlugu apeqquteqaat aallaavigalugu oqallinnissamik siunnersuut imaattoq matumuuna saqqummiuppara:

Apeqquteqaat aallaavigalugu siunnersuut, Kalaallit Nunaata sakkulersorfiunngilluinnarnissaata suut pitsaaqutigalugillu ajoqutiginerai.

(Inatsisartunut ilaasortaqaq Anna Wangenheim, Demokraatit)

Isertugaataangilaq, pissaanilissuit issittumut tamarmut politikikkut soqutigisaqartorujussuunerat. Demokraatit Kalaallit Nunaat nunarsuup kitaanut ilaasutut pissusissamisuginnartutut isigaat aammalu Kalaallit Nunaat namminersortoq uagut isumarput malillugu taassuma tungaanut sulii ingerlassasoq.

Qularutissaangilaq, pissaanilissuit Kina aamma Rusland issittoq taamatullu Kalaallit Nunaat periarfissalissuuartut isigimmassuk. Taamaattumik pingaartuuvoq, eqqarsaasersuutigissallugu, kalaallit nunaata oqartussaaffiata tassanilu Kalaallit Nunaata imartaata illersorneqarnissaa.

Naalakkersuisut ersarilluinnartumik nalunaarutigisimavaat, Kalaallit Nunaat sakkulersorfiunngilluinnassasoq kissaatigalugu. Tamannali qanoq isumaqarpa? Ilisimatusarfimmi ilisimatuut imaluunniit Forsvarsakademiimit akissutissaqartingilaat. Tamannalu aamma Naalakkersuisut akissutissaqartingilaat. Qanoruna Kalaallit Nunaata sakkulersorfiunngilluinnarnissaanik oqarneq Naalakkersuisut isumaqartikkaat?

Nunanut Allanut, Inuusutissarsiornermut, Niuernermit Silaannaallu pissusaanut Naalakkersuisoq arlaleriarluni oqaaseqartarpoq, Kalaallit Nunaat sakkulersorfiunngilluinnassasoq kissaatigalugulu siunissami Kalaallit Nunaata USA-mit illersorneqarnissaa nunaqavissunik sineriammi nakkutillineq tapertaralugu. Qanoruna takorloorneqartoq, taanna periuseq piviusunngortinneqassasoq? Pituffimmi sakkutooqarfik atorunnaarsinneqassava? Issittumi sakkutooqarfiup allaffeqarfia suneqassava? Kangerlussuarmimi mittarfik? Tamakku eqqarsaatersuutigineqarsimanerlutik?

Demokraatit isaannit Kalaallit Nunaata sakkulersorfiunngilluinnarnissaa piviusorsiuunngilluinnartut takorloorneqarpoq. Taamatullu nunatta inissisimanagera nunarsuarmi pissaanilissuarnut soqutiginaateqarpallaarpoq. Taamaammattumik pinngitsoorata illersorsinnaasariaqarpugut, suleqateqartariaqarlutalu, nunatta eqqissisimasuunissaa qulakkeerumallugu. Taamaattumik allaqqussinnaangilaq nunanit allamiunit sakkutooqarnissaa soorlu assersuutigalugu Pituffimmi sakkutooqarfimmi aammalu Kangerlussuup mittarfiani.

Taamaattumik uppiasuunertut isikkoqarpoq Kalaallit Nunaata sakkulersorfiunngilluinnarnissaanik takorluugaqarneq, soqutiginarporlu Naalakkersuisut politikkimut taamaattumut inatsisartuni amerlanerussutilinni tapersorneqarnersut paasissallugu.

Oqallinnermi matumani taassuma qulaajarneqarnissaa qilanaaraara.

Oqallisigisamut Naalakkersuisut partiillu allat isummernerat tusassallugu qilanaaraara.